

Callari Pedro

Pedro saludashcamunda

1 ¹ Jesucristo agllasha cachashca Pedromi gani; quiqingunaj llactamunda llujshish risha Pontobi, Galaciabi, Capadociabi, Asiabi, Bitinia llactabish causaguj agllushcagunamu escribini. ² Taita Diosmi cangunadaga ñaubagunamundati rijsisha Espíritu linshuyachiqui Paida cazuchun shinaidi Jesucristoj yaurgun p'itsilquishca gachunmi agllaga.^a Dios cushca alligunash c'uilla causish cangunabi cutin cutin mirarichun.

Alligunada chapagushalla causanamunda

³ Ñucuchij Mandaj Jesucristoj Taita Diosta 'Allimi gangui' nishunchi. Pai ñucuchida manchanaidi llaquishcallamunda Jesucristoda huañushcagunapuramunda causachishami alligunada chapagushalla causachun ñucuchida cutin huacharishcagunada rurashca. ⁴ Shinami jahua pachabi cangunamu huaquichisha charishcada, pish na tucuchishtibuj naidi mapayibuj na maugayaj japinadami charinguichi. ⁵ Cangunaga crishcamundami Dios quishpichinada japingagama tuquida ruri pudishcan huaquichishcaguna ganguichi; ña parijasha charishca quishpichinadaga tucurij p'unllabimi ricuchinga. ⁶ Chimundami jatun cushida charinguichi; shinash

^a1.2 Israelgunaga juchada rurujcunada linshuyachingujca animalda huañuchisha yaurgun paigunaj jahuabi p'itsilquijcunaga. Jesús cruzbi huañushcamunda Paibuj yaurgun linshuyachishcami ganchi. Heb 9.13-14

cununga asha p'unllaguna tuqui laya llaquigunada apana gaquimaga llaquida apanguichimami. ⁷ Shinami curida ninan yacuyachishcama laya, canguna crishcadaga cabishcadichu gashcada ricuchishca ganga;^b shina crishcaga chingarijlla curidash yalli ashtandi valijmi gan, shinusha chi crijca Jesucristo ricurina p'unllabiga jatunyachishca, allibi churashca, Dios 'Alli' nishcami ganga. ⁸ Cangunaga Paida na ricushcashamash c'uyanguichimi, cununga na ricushash crigushami maida na parli pudibuj c'uilladij cushin cushiyaringuichi. ⁹ Cangunaj almada quishpichigushcamundami shina cushiyaringuichi; crishcamunda japinaga chilladimi gan. ¹⁰ Cai quishpirinamundaga Dios nishcada parlujcuna yuyillandi alli alli tapiq'uichusha yachushami, Dios cangunamu cuna gashca alligunamunda parlugaguna. ¹¹ Cristoj Espiritumi Dios nishcada parlujcunamunga Cristo llaquigunada apanashcadash chi q'uipaga alli c'uilla tucunagunadash ñaubushadi yachi chayachiga. Chi Espiritu paigunabi gasha ricuchiquimi, paigunaga ima shina ima p'unlladi shina tucunashcada yachungu munugaguna. ¹² Shinash Diosca Pai parlachigushcadaga na paigunamu gashcada ashtangarin cangunaj allibuj gashcadami yachi chayachiga. Shinaquiga cununga, jahua pachamunda cachashca Diosbuj Espiritu Alli Shimida parlachiqui cangunamu parlashcami gashca. ¡Caigunadaga angelgunaidiquish manchanaidi yachungu munanguna!

^b1.7 Ro 5.3-5; Stg 1.2-3; 1 P 4.12 Curidaga ninan yacuyachishami imanbish chagrushca na chagrushcachu ricungu shina ruran. Chibimi ima na allida anchichishtasha curilla gachun saquin. Caida parlashaga romanogunaj maquibi crijcuna catiq'uichushca gasha llaquida apanashcadami nigun.

Ima juchash illuj causachun Dios cayashcamunda

¹³ Shinushaga cangunaj yuyibiga chumbillirishca shina ruranalladi gasha na alligunamunda yuyillandi jarcarichi; Jesucristo ricurina p'unllabi Dios cangunamu alligunada cunashcada japingu tuqui yuyida chillabi churasha chaparianguichi. ¹⁴ Alli cazuj churi ushigunashcamundaga, cabishcada narij yachasha rurungu munushca layaidijca ama munichichu. ¹⁵ Ashtangarin cangunada Cayujca ima layami ima juchash illaj gan, shinaidi cangunash tuqui imalla rurashcagunabi ima juchash illuj gaichi. ¹⁶ Dios escribichishcabiga, “Ñuca jucha illaj gashcamundami cangunash ima juchash illaj ganguichi,” ninmi.

¹⁷ Diosca pibuj partish na tucushalla shuj shujta ima rurashcada ricusha cauzayujtichu gashcada ricujmi; Paidaga ‘Taita’ nisha cayashadijca, cai pachabi pasagujlla shina causashcagamaga manchusha cazusha causichiri.

¹⁸ Cangunaj ñauba taitagunamunda yangaidi causida japiganguichi; chaimunda randiqui cacharichishca shina gashcada yachanguichimi; curiman cuchquiman ima tucurijllagunallan na randishcachu ganguichi.

¹⁹ Ashtangarin Cristoj manchanaidi valij yaurgunmi shina ruraga. Paiga ima mapash ima na allimash illaj, malta oveja shinada huañuchichun cushcami gaga.^c ²⁰ Cai pachada narij rurujllabidi Cristoga shina tucuchun ñami agllushca gaga. Shinash cai tucuri p'unllagunabimi cangunaj allibuj ricurishca. ²¹ Cangunaga Cristomundami Diosta cringuichi; canguna tuqui yuyida crishcadash Diosbi churasha chapaguchunlla, Paidami

^c**1.19** Malta ovejamunda Ap 5.6 ura chaquibi yachachishcada ricungui.

huañushcagunapuramunda causachisha jatunyachiga.

²² Cununga cabishca parluda cazushcamunda cangunaj almagunada ña linshuyachishca gasha ña na nij tucushalla c'uyanucujcuna gashcamundami caishuj chaishuj shungundijta cabishcada tuqui munin c'uyanucugunguichilla.

²³ Chibujtimi cangunaga huañujlla taitamundaga na cutin huacharishcanguichichu; ashtanbish causaj shinaidi ima urash na chingarij Diosbuj Shimimundami na huañujbuj taitamunda huacharishcanguichi. ²⁴ Dios escribichishcabiga,

“Tuqui gentegunaga q'uihua shinallami,
paiguna c'uilla gashcash, q'uihua sisa shinallami.
Q'uihuaga chaquirinllami,
sisash urmunllami.

²⁵ Ashtangarin Mandujbuj Shimiga
tuqui ratugama chibi gagungallami,” ninmi.

Cangunamu yachi chayachishca Alli Shimiga caimi gan.

2 ¹ Shinushaga tuqui milligunada, tuqui layada llagmashalla parlanadash, jahua shimillan nij tucunalladash, shujbujta munasha huañurinadash, shujmunda huashalla rimanadash anchuchishtusha, ²⁻³ Mandajta divirti alli gashcada ña mallijcuna gashaidijca, ima layami huacharishcalla maraguna lecheida ministin, Diosbuj Shimidaga imanbish na chapushca lechemada layaidi manchanaidi munuj gaichi. Shina rurushami quishpichishca ganabi iñusha catinguichi.

Cristo causuj rumi shina gashcamunda

⁴ Mandujmu cuchuyichi; Paiga causuj rumimi.
Genteguna na munusha shitushca rumi gaquish
ashtangarin Diosbujca ch'icunyachishca manchanaidi

valijmi gan. ⁵ Cangunash causuj rumiguna shina Dios Paibuj Espiritumu Quiquinbuj huasida huasichishcaguna laya ganguichi, shinaidi Diosbujlla curagunami tucuna ganguichi; chimunda Jesucristomundami Dios japinalla sacrificiogunada Espiritu yuyachiqui cunguichi.^d

⁶ Chimundami Dios escribichishcabi cashnada nin:

“Riquichi, Sionbiga^e huasida rurungu callarimu churana tuquimunda ch'icunyachishca, yalli alli valichishca rumidami^f Ñuca churani; maijinsh Paibi yuyida churajca pinganaibiga naidi saquichishca gangachu.

⁷ Shinusha canguna crijcunamuga chi rumiga manchanaidi valijmi gan; cutin na crijcunamuga,

“Huasichijcuna na munusha shitushca rumiga ashtan callarimu churana rumimi tucushca,” nin.

⁸ Shinaidi shuj pushtubiga,

“Trancarina rumi, urmachichij rucudi rumimi.”

Diosbuj Shimida na cazujcuna gashami chibi trancarisha urmunguna; shina tucuchunlladi nishcami gagaguna.

⁹ Shinash cangunagarin Dios agllashcagunapuramunda, Jatun Mandujbujta ruraj curaguna, Diosllamu ch'icunya-chishca llactamundaguna, Diosbujlla gachun randishca pueblomi ganguichi. Yanamangamunda c'uitij luz shina causimu llujshichisha cangunada Cayajmi Paibuj c'uitij rurashcagunada yachi chayachichun shina ruruga.

^d2.5 Diosmu sacrificiogunada cungajca Dios munushca shina allida rurasha causachun nishami shina nin.

^e2.6 Sionmunda Jn 12.15 ura chaquibi yachachishcadash ricungui.

^f2.6 Tuquimunda yalli alli valichishca rumiga Jesucristomigun; Paidami crina gan.

2.4 Sal 118.22 2.6 Is 28.16 2.7 Sal 118.22

2.8 Is 8.14; Ro 9.33 2.9 Ap 1.6; 5.10

¹⁰ Cangunaga ñaubaga pueblomallash na gaganguichichu, shinash cununga Diosbujtigunami ganguichi. Ñaubaga cangunamunda Dios na llaquirigachu, shinash cunungarin cangunamunda llaquirinmi.

Mandanabi gajcunadash cazunamunda

¹¹ C'uyashca huauqui paniguna, shuj llactamunda shamujcuna laya shinaidi cai pachabi pasagujlla shinagunami ganguichi; chimundami cangunadaga alman macanucuj aicha munida ruranamunda huaquichirichun rugani. ¹² Diosta na crijcunaj ñaubuquish cabishcaida rurusha causichi. Shina causaquimi cangunada, “Na allida rurujcunamigun,” nisha murmurajcunash canguna alli ruraguscada ricushami, Dios shamuna p'unllabi Paida ‘Allimi gangui’ ningaguna.

¹³ Mandanabi gaj tuquigunadaga Mandaj Jesusmunda cazujcuna gaichi, cai pachabi jatun mandajtash tuqui mandanada charishcamunda, ¹⁴ pai churashca ashada mandujcunadashmi cazunanguichi; na alli rurajcunada llaquichichun shinaidi alli rurajcunadaga ‘Allimi’ nichun cachan. ¹⁵ Yuyi illuj imadash na yachajcunadaga allida ruraguscan upayachichunmi Diosca munan.

¹⁶ Huatashcamunda cacharichishca shina gaichi, shina causashash ‘Ña cacharishcami ganchi’ nij tucusha p'acta na allida ruranguichimu, ashtangarin Diosbujta rurungu huatushcaguna shina gaichi. ¹⁷ Tuquigunan allibi churanuquichi. Huauqui panigunada c'uyichi. Diostaga manchichi. Llactada jatun mandujta cazichi.

Sirviycuna ima imada ruranamunda

¹⁸ Sirviycuna, cangunada mandujcunada tuqui yuyin cazujcuna gaichi; canmunda allida rurujcunama yuyariycunamaidash ama cazichu, ashtangarin naidi aguantibujcunadash cazichi. ¹⁹ Shinushaga maijinsh shungubidi Diosbujta rurungu munilla gaqui allijuilluidi llaquichishca gashash llaquigunada apagushaga ‘Alli’ nishcami ganga. ²⁰ Shinaquiga canguna na allida rurushcamunda juactushtaqi, na p’iñarishalla llaquida apagushtijca, ima allibujquish na ganchu. Ashtangarin allida ruragushash llaquida na shaicushalla apagujca, Diosti ‘Alli’ nishcami gan. ²¹ Shina rurachunmi Diosca cangunadaga cayuga; Cristoshmi ñucuchimunda llaquida apashaga ñucuchiquish Pai layaidi rurasha Pai sarushcallati catichunmi shina ruraga. ²² “Paiga ima juchadash na rurugachu, shinaidi jahualla shimin pidash na crichijchuga.” ²³ Litushtaguquish shinamaidijca na litujchuga, llaquichishca gagushash ‘Shinaidimi llaquichisha’ nishamaga na nijchuga; ashtangarin imadash cabishcada ruruj Juezmumi mingaj gaga. ²⁴ Juchada rurangaj ña huañushagag cabishcada rurusha causachunmi Cristolladi ñucuchij juchagunada Paibuj cuerpobi cruzmu apaga. Paida chugrichishcamundami alliyachishca gaganguichi. ²⁵ Cangunaga ñaubaga maidash cachun rijlla ovejaguna shinami gaganguichi, shinash cununga cangunaj causida Chapaguj shinaidi Michijmumi vueltushcanguichi.

§2.24 Jesucristoda crijcunaga juchada cununmunda pacha ama rurush catingumi ñucuchiga chibujca huañushcama shina tucuganchi. Ro 6.2-13

2.22 Is 53.9

Cusandij huarmindij ima laya causanamunda

3¹⁻² Shinalladi huarmigunash, cangunaj cusagunada alli cazujcuna gaichi; canguna juchada na ruruj ashtan alli cazuj gashcada ricushcallamunda maijin cusagunaga Alli Shimida na crij gashash quiquinbuj huarmi ima laya gajta ricushalla imadash na nijllabidi crij tucungagunami. ³ Canguna c'uilla gashcaga ama jahua jahualla parijarishcallabi, juacchada c'uilladi naccharishcama, curin rurashcagunada aparishcama, allilladi churanada churarishcamamunda gachun. ⁴ Chibuj randiga canguna c'uilla gashcaga shungu ucumundadi na p'iñarij chulunyashca espiritun na tucuribujti c'uilla gashca gachun. Diosbuj ñaibuquiga caimi yallidijca valin. ⁵ Ñaubagunagarin Diosbujlla gaj huarmigunash shina layaidi Diosbi yuyigunada churasha cusagunada cazushami allilladi parijarijma laya rurujcuna gaga. ⁶ Sarash shinami paibuj cusa Abrahamdaga 'Ñucada mandaj' nisha cazuga. Cangunash allida rurasha shinaidi imadash na manchuj gashaga Saraj ushigunami tucuganguichi.

⁷ Cusagunash shinaidi quiquinbuj huarmin alli yuyarisha causichi. Paiguna Dios cumbidashca causida cangunandi japijca gashcamundaga jahuaidi p'aquirijlla vazumada shina huarmidaga yalli valichichi. Canguna Diosta mañaqui imabish ama trancarichunga chaida rurichi.

Allida rurushash llaquida apanamunda

⁸ Caida tucuchingaj tuquiguna shuj shinalla yuyarisha llaquirinucusha cushiyarinucusha shinaidi huauqui panigunapura shina c'uyanucusha, shujcunamunda llaquirijcuna shinaidi na jatun tucujcuna gaichi. ⁹ Ima

na allida ruraquish ama shinaidijca rurichichu, lituquish ama shinaidi litichichu. Chibuj randiga paigunamu Dios alligunaida cuchun mañichi. Alligunada japichunlladimi cangunadaga Diosca cayaga. ¹⁰ Dios escribichishcabiga,

“Maijinch causida c'uyusha cushilla p'unllagunada charingu munujca quiquinbuj c'alluda na allida rimanamunda shimish llagmusha parlanamundash jarcarichi. ¹¹ Na allida ruranamunda anchurisha allida rurichi; tuquigunan c'uilla causungu muni-chi, chidati catichi. ¹² Mandujbuj ñahuigunaga cabishcada rurujcunaquimi churashca gan; Paibuj rinringunash paiguna mañushcagunada uyungaj yuyinlladimi chapagun; shinash Mandujca millida rurajcunadaga na allibi churashami ricun,”
shinami nin.

¹³ Shinusha allida rurana yuyilla gaquiga, ¿cangunada pidij na allidaga ruri pudingari? ¹⁴ Ashtanbish cabishcada ruragushash llaquichishca gashamaga, ¿cushiyachishca ganquichi! Chi llaquichijcunamunda mancharishama musparishamash ama gaichichu. ¹⁵ Chibuj randiga cangunaj shungubi Cristodaga ‘Mandajmi’ nisha allibi churichi. Canguna chapagushcada imamunda charishcada maijnguna tapuquiga c'uiti vueltachingajca p'unllandijta parijarishca gagüichilla. ¹⁶ Imada parlashash c'uyi shungun Diosta manchushash parlarichi. Cristoda crij shina canguna alli gashcamunda rimusha juchachijcunaga pinganaibi saquirichun linshu yuyin gananguichi.

¹⁷ Na allida rurashcamunda llaquida apanabuj randiga, Dios munashca gaquiga allida rurashcamunda llaquida apanami alli gan. ¹⁸ Cristolladiquish cangunada Diosmu pushangajmi cabishcada ruruj gashash na cabishcada

rurujcunamunda juchagunamunda shuj cutinlla llaquida apaga; aichabiga huañuchishcamiga shinash Espiritubiga causachishcami gaga. ¹⁹ Espiritubi gashami prezu tiyaj espiritugunamush yachi chayachingu riga. ²⁰ Chi gentegunaga Noé causagushca ñauba p'unllaguna jatun barca rurarish catiguqui Diosca na ut'cada p'iñarishalla shuyaguquish na cazujcunami gaga. Chi barcamu huaigushami chi llaqui yacumundaga ashagunalla quishpiriga, tuquigunamundaga pusujpurallamiga. ²¹ Chi yacuga bautizarina ima laya gajtami ricuchin; cununga ñucuchiquish yacun bautizarishcanga Jesucristo causarishecumundami quishpichishca ganchi. Bautizarinaga na quiquinbuj aichadaga mapalla gashcada maillarinachu, ashtangarin Diosbuj ñaibuqui linshu yuyi gangu munushcadami nigun. ²² Jesucristomi jahua pachamu risha Diosbuj alli ladubi tiyagun; shinaidi angelguna, poderyuj manduj espiritugunash Pai mandushcabimi ganguna.

Ñauba causida saquisha mushujta causanamunda

4 ¹ Shinushami Cristo Paibuj aichabi llaquigunada apashcamunda cangunash llaquida apana yuyillan parijarichi. Maijinsh quiquinbuj aichabi llaquida apajca, llaquiga juchada ruranamundaga ña anchuchishtanmi; ² cuerpo huañuna p'unllagama genteguna milli munushcagunaida rurusha ama causachun ashtangarin Dios munashca shina causachunmi gan. ³ Ña chilla! Diosta na rijsijcuna rurungu yachashca layaidi rurushami tauga huatagunada chingachishcanguichi, piyunbish siririnada na jarcarisha, mapa yuyigunaida munusha, machashash, maidash cachun micushash, pishtagunabi maidash cachun rurashash, millanaidi rurushcalla dioscunadash

‘alli’ nishami puriganguichi. ⁴ Imabibish na jarcarisha milligunada rurusha canguna paigunan ña na riguquimi cununga paigunamunga shuj layami ricurin, chimunda juchachisha rimunguna. ⁵ Shinash huañushcagunash causujcunash ‘Cauzayujmi, na cauzayujchu’ ningu Shuyaguj ñaibuquimi ima layashcadash paigunalladi parlaringaguna. ⁶ Shina rurana gashcamundadimi huañushcagunamush Alli Shimida parlushca gaga; cuerpobi causaguqui tuqui gentegunada layaidi llaquichishca gashash espiritubigarín Dios munushca shina causachunmi gan.

⁷ Tuqui imalla tiyajcuna tucurina p'unllaga ña chayamugunmi. Chimunda Diosta alli mañariangujca na quillanachishalla yuyi japishca gaichi. ⁸ Tuquimunda yalliga caishuj chaishujcun pachun c'uyanquichi. Shina c'uyanucushcaga taugaidi juchagunada c'atachishca shinami gan. ⁹ Huasha huasha na rimashalla, caishuj chaishujcun huasibi japinucujcuna gaichi. ¹⁰ Tuquigunami Dios cumbidashca ch'icun ch'icun ruri tucunagunada japiganguichi; chimunda Dios cushca tuqui laya alligunada alli apujcuna shina chi ruri tucushcagunanga chaishujcunamu sirvinguichi. ¹¹ Maijinsh parlarigushaga Diosbuj Shimigunadadi nigushca shina parlachun; maijinsh shujcunada ima allida rurushaga Dios cushca ruri pudishcan rurachun; shinaquiga tuqui imada rurashcabish Jesucristomunda Diostaga ‘C'uillami gangui’ nishcami ganga; ima urash na tucuringama ‘C'uillami gangui’ ninash tuquida mandanabish Paibujmi gan! Shina gachun.

Cristo apashca shinalladi llaquida apanamunda

¹² C'uyashcagunalla, canguna ima laya gashcada ricungaj llaquiguna nina shina shamiqui, naidi ricushca

pasagushcama layada mancharishca ama saquirichichu; ¹³ chibuj randiga Criston igulda mashna llaquigunada apashcama shina apagushcamunda cushiyichi; shina rurushaga Pai c'uilla p'alaniguj gashcan ricuri p'unllabish manchanaidimi cushiyaringui. ¹⁴ Cristoj shutida crishcamunda cangunada rimaqui cushiyachishca ganguichi; Diosbuj c'uitij Espíritu cangunandi gagushcallamundami shina rurun. ¹⁵ Maijinsh cangunapuramunda llaquida apagushaga huañuchij gashcamundama, shuhuashcamundama, millida rurushcamundama, shujcunaj causibi satirishcamundamash ama gachun; ¹⁶ ashtanbish Jesucristoda catij gashcamunda llaquida apagushaga na pingui tucunachu gan, chibuj randiga chi shutida apashcamunda Diosta 'C'uillami gangui' ninami.

¹⁷ Diosbujcunandi callarisha cauzayuj na cauzayujchusheca ricuna p'unllaga ña p'actushcami, ñucuchida shina llaquichi callarishadijca, Diosbuj Alli Shimida na cazujcunagarin ¿ima tucungagunashi? ¹⁸ Shinaidi cabishcada rurajquish jarca jarcalla quishpiriquidijca ¿Diosta nalladi crij shinaidi juchada rurujcarin maibi saquiringashi? ¹⁹ Shinaquiga Dios munashca shina llaquida apagujcunaga allida rurush catishalla tuquida Ruruj shinaidi tuquida P'actachij Diosbuj maquibi quiquinbuj causida mingarichunguna.

Crijcunada pushujcunamu

5 ¹ Cununga cangunapurabi gaj pushaj yuyijcunadami, ñucash canguna layaidi yuyij gasha shinaidi Cristo llaquigunada apagujtadi ricuj gasha Pai c'uilladi gashcada yachi chayachina punllabi ñucash Paigundi chibi ganashami, caigunada mañush nini. ² Dios cangunamu mingushca

ovejagunada alli michichi; muni na muniidimaga ama rurichichu, cuchquida japina yuyillamamundash ama rurichichu; ashtangarin Dios munushca shina tuqui munashcan paigunada chapanguichi. ³ Cangunamu mingushcagunadaga ama paigunaj dueñogunama shina mandichichu, ashtangarin ovejagunamunga canguna rurashcada ricusha catinallaguna gaichi. ⁴ Shinami michijcunada Jatun Michij ricurina p'unllabiga cangunaga p'alaniguj na chingarij c'uitij coronada japinguichi.

Tuqui crijcunamu

⁵ Shinalladi q'uipa iñigunash, pushuj yuyijcunada cazujcuna gaichi; tuquigunami na jatun tucushalla caishujcun chaishujcun cazunucujcuna gananguichi, cashna nishcamunda: “Jatun tucushcagunanga Diosca jinchi tucunmi, ashtanbish, ‘Imash na ganichu,’ nijcunamunga Diosca alligunada kujmi.” ⁶ Chimunda Diosbuj ruri pudibuj maquibi gashcamundaga imash na gaj shina tuquichi. Chibimi cangunada jatunyachina p'unlla chayuquiga Paiga jatunyachinga. ⁷ Canguna llaquilla gashcagunada illujtada Diosmu shitichi; Paiga cangunada chapana yuyillami gan.

⁸ Cangunada na ricunachij diabloga caningudi niguj león shina, maijindash micushtangu saltiq'uichushaidimi mashcagun. Shina gashcamunda na alligunamunda jarcarisha yuyillandi puringuichi. ⁹ Illujta cai pachamunda cangunaj huauqui panigunash chi llaquigunalladati apagushcada yachushami crishcan jinchi shayarisha diablodaga ima layash jarcush catichi. ¹⁰ Tuqui laya alligunada kuj Diosca Paibuj na tucuribuj c'uilladij ganamu Jesucriston gashcamunda cayagami; shinusha

asha p'unllagunada llaquida apagushca q'ui paga,
cangunadaga tuquibi alliguna gajta, crishcabi jinchi
shayajta, chi yuyillan catigujta, pish na cuyuchibujta
Pailladi rurunga. ¹¹ Ima urash na tucuringama illujtada
mandana Paibuj gachun.^h Shina gachun.

Tucurina yuyigunamunda

¹² Huauqui Silvanoⁱ alli p'actachij crij gashcada
yachashami cangunamu ashallada escribisha paigun
cachani. Cai alligunada cushcanmi Diosca cangunada
divirti c'uyashcada yachi chayachingu ñaubujmu
catina yuyidash cachani. Chi c'uyimundaga amalladi
laduyanguichichu.

¹³ Canguna layaidi agllushca Babiloniabi gaj
crijcunash ñucaj churi shina Marcosbish saludangunami.

¹⁴ Caishujcun chaishujcun c'uyanucusha ñahui ichibi
muchusha 'Alli gashca ganguichi' ninuquichi. Tuqui
mashnalla Cristoj gajcuna c'uilla causi cangun gachun.

^h**5.11** Shuj versiongunabiga, “cuilla gashcash Paibuj gachun,” nishca-
da churan.

ⁱ**5.12** Silvanodaga Silas nishashmi nijcuga. Hch 15—18